

Rapport 2019



In radunanza da la Società Löö d'inscunter Chasa Fliana Lavin, dals 27 marz 2019, 20:15 h illa Chasa Fliana, d'eiran preschaints 27 commembras e commembers cun dret da vuschar. La radunanza es gnüda manada dal president da la società. Per la tractanda no. 6 "Constituir la Fundaziun Chasa Fliana" haja fat dabsögn d'ün documaint public dal notar. Sün proposta dal president ha tschernü la radunanza unanimamaing al notar lic. iur. Thomas Nievergelt da Samedan sco actuar per tala tractanda. Davo las explicaziuns introductivas ha decis la radunanza unanimamaing da constituir üna fundaziun tenor art. 60ff.CSS cun las seguaintas meras:

- La promoziun generala da la vita culturala in Engiadina e Val Müstair;
- Il sustegn dad activitats sco cuors, referats etc. chi's drizzan a tuot la populaziun e chi promovan ils contacts socials ed il sustegn dad activitats fisicas e psichicas;
- La promoziun da spüertas da scolaziun supplementara, pustüt per personas chi lavuran in l'agricultura.

Per accumplir quistas meras dess la Fundaziun promover la realisaziun dad activitats chi correspuondan a las meras da la fundaziun e pussibiltescha l'organisaziun da quistas illa Chasa Fliana a Lavin. Priorità d'esser avair las activitats da la Società Löö d'inscunter Chasa Fliana. Implü administrescha e mantegna la Fundaziun la Chasa Fliana a Lavin. La Fundaziun dess esser d'ütlil public e nu dess perseguitar böts commercials e far guadogns. Per quista mera ha proponü la suprastanza da surdar a la fundaziun l'immobiglia Chasa Fliana, Lavin, üna facultà in daner bluot da CHF 45'000.00 ed ün dabun da CHF 55'750.55.

Il sböz dals statuts da fundaziun preschantats sun gnüts deliberats artichel per artichel e davo la deliberaziun ha la radunanza approvà tals unanimamaing. Sco commembers dal cussagl da fundaziun sun gnüts elets Anastasia Parli, S-chanf, Gion Peider Mischol, Zernez e Jachen Erni, Scuol. Las personas elettas han acceptà l'elecziun. Il notar pissera cha'ls documaints respectivs vegnan registrats aint il register da commerzi dal Chantun Grischun ed aint il cudesch fundiari dal Cumün da Zernez.

Davo la radunanza ha gnü lö la tschantada constitutiva dal cussagl da fundaziun. Il protocol es gnü manà dal notar. Il cussagl da fundaziun s'ha constitui seguaintamaing: president Jachen Erni, commembers dal cussagl, Annastasia Parli e Gion Peider Mischol. Il dret da suottascripziun es gnü stipulà da möd cha tuots trais commembers suottascrivan da maniera collectiva, adüna in duos. Sco post da revisiun es gnü tschernü Roger Taverna dal büro Taverna Treuhand AG, a Scuol.

Als 2 settember 2019 ans es gnü fat cuntschaint la trista nouva da la mort da nos president d'onur, sar ravarenda Rico Parli. Trists e plain arcugnuschtscha vaina tut cumgià dad el als 9 settember. Il suotsegnà, sco president da la fundaziun, ha tut il pled in baselgia San Luzi a Zuoz e condolà a la famiglia sco eir ingrazchà al defunt per tuot quai ch'el ha fat per nus. Il text dal pled da cumgià fuorma üna part integrala da quist rapport.

Als 9 october 2019 ha inoltrà il büro Nievergelt & Stoehr, Samedan la dumonda a l'administraziun d'impostas chantunala per üna deliberaziun da las impostas. Malgrà la buna motivaziun es la dumonda gnüda refüsada.*

L'on da gestiun ha dürà dals 27 marz fin als 31 december 2019. Il quint serra pro entradas da CHF 40'130.90 e sortidas da da CHF 30'141.05 cun ün guadogn da CHF 9'989.85. Las activas totalas s'amuntan quattras a CHF 300'365.60. Pro las entradas figüreschan eir las donaziuns in memoria da Rico Parli chi s'amuntan, cumprais la collecta in baselgia da CHF 1'370.90, a CHF 5'100.90. Las entradas da fittada s'amuntan a CHF 35'030.-. Quist resultat fich allegraivel es stat pussibel be grazcha al instancabel ingaschamaint da nossa administratura Anna Margaritta Filli. Ad ella pertocca ün sincer ingrazchamaint. Grazcha fich eir a sar lic. iur. Thomas Nievergelt pel grond sustegn e per la stupenda preparaziun da la documainta, als commembers dal cussagl da fundaziun, a sar Andrea Zogg dal büro Accontaris Treuhand AG, Scuol ed al post da revisiun sar Roger Taverna dal büro Taverna Treuhand AG Scuol per la buna collavuraziun sco eir a tuottas persunas chi praistan in che möd chi saja lavur a bön da la Fliana.

Scuol, 28 mai 2020

Il president: Jachen Erni

** Nossa dumonda da reponderaziun ha l'administraziun d'impostas approvà e deliberà nossa fundaziun a partir da la perioda 2019 da las impostas. Donaziuns a la fundaziun as po trar gio da las impostas.*